

Mahasiswa sebagai pewaris dan peneraju kepimpinan

NST 9.9.2017
OLEH JAINUDIN DJIMIN

LABUAN: Masyarakat mengharapkan mahasiswa menjadi pewaris kepimpinan, peneraju ekonomi, pencipta ilmu dan teknologi, ejen perpaduan dan perubahan serta sumber modal insan dalam sektor awam dan swasta.

Justeru, tugas mahasiswa adalah membalas harapan mereka dengan sebaik mungkin dengan menyemai bakti demi keutuhan agama, bangsa dan negara.

Demikian kata Naib Canselor Universiti Malaysia Sabah (UMS), Prof. Dr. D Kamarudin D Mudin ketika berucap pada Majlis Lafaz Ikrar dan Aku Janji Pelajar Baharu UMSKAL, di Dewan Utama UMSKAL di sini kelmarin.

Teks ucapan beliau dibacakan oleh Pengarah UMSKAL, Prof. Madya Dr. Murnizam Haji Halik.

Beliau berkata, sebagai golongan terpelajar, mahasiswa dipandang dan diletakkan pada kedudukan tinggi oleh masyarakat.

“Tugas mahasiswa adalah membalas harapan masyarakat dengan sebaik mungkin dengan menyemai bakti demi keutuhan agama, bangsa dan negara,”katanya.

Pada majlis itu, seramai 538 pelajar baharu telah melaporkan diri membabitkan 463 pelajar Fakulti Kewangan Antarabangsa Labuan (FKAL) dan 75 pelajar Fakulti Komputeran dan Informatik (FKI) melafazkan Ikrar dan Aku Janji.

Turut hadir, Dekan Fakulti Komputeran Dan Informatik (FKI), Prof. Madya Dr. Ag Asri Ag. Ibrahim dan Dekan Fakulti Kewangan Antarabangsa Labuan (FKAL), Prof. Madya Dr. Hanudin Amin.

Hadir sama, Timbalan Pengarah

UMSKAL merangkap Pengerusi MSM Sesi 2017/2018, Prof. Madya Dr. Geoffrey Harvey Tanakinjal dan Timbalan Pendaftar Kanan UMSKAL, Zamri Mohammad Tuah.

Kamarudin berharap, kehadiran pelajar baharu ke UMS bakal menghasilkan kejayaan yang cemerlang serta sejarah kehidupan yang membanggakan sepanjang tempoh pengajian di universiti ini.

Selain menimba ilmu akademik, beliau mahu pelajar baharu mengambil peluang memahami budaya masyarakat di Sabah dan Wilayah Persekutuan Labuan.

“Kehadiran anda kami sambut dengan rasa penuh tanggungjawab. Anda adalah amanah ibu bapa dan negara yang harus kami sempurnakan,” katanya.

Mengenai lafaz ikrar itu, Kamarudin mahu mahasiswa menghayati dengan sepenuh jiwa, difahami maksudnya dan diikuti sehingga tiba saat menerima segulung ijazah di atas pentas Dewan Canselor yang penuh gah.

Ikrar pelajar UMS menggariskan empat perkara iaitu mematuhi akta, perlembagaan, statut, peraturan dan tata tertib yang berkuatkuasa di universiti ini.

Elemen ini mengkehendaki mahasiswa untuk akur dan mengikuti segala peraturan yang ada selama bergelar pelajar di UMS.

Katanya, peraturan yang dibuat bertujuan membentuk mereka supaya berdisiplin, di samping tidak mendatangkan masalah terhadap mana-mana pihak.

Kedua, ialah mencapai kecemerlangan kesarjanaan akademik dan mempertahankan kebebasan berbuat demikian.

Berbeza dengan cara pembelajaran

di sekolah, di universiti mahasiswa semua dituntut agar berfikir secara kritis dan kreatif, berfikir di luar kotak dan berdikari dalam menuntut ilmu.

“Para pensyarah akan membimbing menerusi kuliah yang disampaikan, tetapi andalah yang harus berusaha mencari sebanyak mungkin ilmu tentang apa yang dikuliahkan.

“Caranya, menerusi pembacaan di perpustakaan dan sumber maya yang lain. Inilah yang akan memantapkan pemikiran anda, sekali gus membezakan anda dengan pelajar sekolah,” katanya.

Kamarudin juga mahu pelajar menjadi warga yang berdisiplin dan mengutamakan kualiti dalam pelaksanaan aktiviti. Konteks disiplin yang digariskan di sini adalah luas maksudnya. Ia merangkumi disiplin dari segi pengurusan masa dan tingkah laku.

Bagi penuntut universiti, semestinya semua perkara hendaklah dilakukan secara berdisiplin. Hanya pelajar yang berdisiplin mampu menguruskan kehidupannya dengan baik.

Menyentuh tentang mengutamakan kualiti dalam melaksanakan aktiviti pula, ia berkait dengan kualiti dalam melakukan sesuatu tugas akademik misalnya.

“Jadikan ia sebagai tanggungjawab dan amanah, bukan sekadar “Melepaskan batuk di tangga,” “Janji asal siap” tetapi hasilnya tidak mencerminkan anda sebagai pelajar universiti,” katanya.

Kemudian, dari aspek pelaksanaan aktiviti universiti, pelajar berpeluang terlibat dengan pelbagai aktiviti persatuan pelajar, misalnya program tanggungjawab sosial korporat, bakti siswa, karnival keusahawanan dan



KENANGAN... Pensyarah FKAL dan FKI bergambar kenangan bersama Murnizam Halik (tengah)



LAFAZ... Muhammad Fariq Mohd Gazali mengetuai Majlis Lafaz Ikrar dan Aku Janji Pelajar Baharu UMS Labuan.

persembahan.

Beliau juga meminta pelajar UMS meningkatkan martabat dan prestij universiti ini dan berbakti mencapai kesejahteraan masyarakat dan negara.

“Sebagai pelajar UMS, anda perlulah berganding bahu dengan warga UMS yang lain untuk sama-sama meningkatkan nama baik universiti selain berbakti kepada masyarakat dan negara,”katanya.

Jelasnya, keempat-empat perkara dalam ikrar pelajar UMS ini tidak akan tercapai sekiranya pelajar tidak menanamkan nilai-nilai murni dalam diri masing-masing iaitu amanah, bertanggungjawab, ikhlas, dedikasi, sederhana, tekun, bersih, berdisiplin, bekerjasama, berbudi mulia dan bersyukur.

Katanya, kini, kita berada di dunia

yang lebih kompleks, dipacu dengan cukup deras menerusi Revolusi Industri Keempat atau IR4.0.

Semua universiti termasuklah UMS turut terkesan dengan impak penggunaan teknologi secara radikal yang dipercayai akan mengubah landskap kehidupan dan norma masyarakat pada masa yang akan datang.

Justeru, universiti juga perlu berubah dan mampu mengadaptasi era digital yang kian rancak berkembang.

Bagi memastikan transformasi ini berjalan lancar, lima aspek nilai perlu ditekankan kepada seluruh warga UMS iaitu Dynamic, Sustainability, Integrity, Joyful dan Justice. Secara ringkas, Dynamic bermaksud warga UMS perlu cepat menerima dan menyesuaikan diri dengan segala perubahan, fungsi dan tanggungjawab.